

## নক্ষত্র কাহিনী

জাহেদ সরওয়ার

আমার কাছে জানতে চেয়োনা  
চুরি করেছিলাম কিনা কোনো নক্ষত্র  
সেই নক্ষত্র বিক্রি করেছিলাম কিনা কোনো সৌরজগতে  
যেখানে সোনালী চুলের সুন্দরীরা আসে  
ছড়ি হাতে হাতে কালো চশমার অন্ধ জুয়াড়ীরা আসে

জানতে চেয়োনা সেই নক্ষত্র পাহারায় রাত জাগি কিনা  
কাঁদি কিনা সেই নক্ষত্রের আলোয়

জানতে চেয়োনা প্রদক্ষিণ করি কিনা তার কক্ষপথ  
জানতে চেয়োনা সেই নক্ষত্রের গতিপথে  
ইতিহাসের পাতা থেকে উঠে আসে কিনা মহাজাগতিক যোদ্ধারা  
কক্ষিণ খুলে বেরিয়ে আসে কিনা এলো চুলের সাদা রাজকুমারীরা  
যারা নিহত হয়েছিল গ্রীসে, রোমে, কায়রোয় কিংবা দিল্লীতে

আমি চুরি যাওয়া সেই নক্ষত্র সম্পর্কে তত টুকুই জানি  
একটি কবর সম্পর্কে যতটুকু জানে একটি মৃতদেহ